



ՄԱՍՆԱՎՈՐ ՎԱՐԴԱՊԵՏԱԿԱՆ ԳԱՎԱԶԱՆԻ ԻՇԽԱՆՈՒԹՅԱՆ ՏՎԶՈՒԹՅՈՒՆ

Հունիսի 23-ին, առավոտյան ժամը 11-ին, Մայր Աթոռ Ս. Էջմիածնի միաբանությունը հոգևոր ուրախության մեջ էր: Այս օրը Լուսավորչատեսիլ Միածնաէջ տաճարում, ձեռամբ Մայր Աթոռիս դիվանապետ և հոգևոր ճեմարանի վերատեսուչ Գերաշնորհ Տ. Ներսես արքեպիսկոպոս Պողապալյանի, տեղի ունեցավ Մայր Աթոռի երկու միաբաններ Հոգեշնորհ Տ. Առաքել արք. Քարամյանի և Տ. Թադեոս արք. Զիրեկյանցի մասնավոր վարդապետական գավազանի իշխանության տվչությունը: Հոգեշնորհ Հայր Սուրբերը նախապես իրենց վարդապետական թեզերն էին ներկայացրել Վեհափառ Հայրապետին և հոգևոր ճեմարանի հարկից ներս հաջողությամբ պաշտպանել դրանք: «Ծջմարտութեան վարդապետ, գերահանճար հոեւոր և սուրբ հաւատոյ, անյաղթ ախոյեան»՝ Գրիգոր Տաթևացին շատ գեղեցկորեն է բնութագրել ՎԱՐԴԱՊԵՏԻ կոչումն ու առաքելությունը. «Վարդապետն իշխան է բանից, որ հրամայէ և ուսուցանէ, Եկեղեցոյ տեսական իմաստասէր, որ մըտօք և բանի տեսանէ և քննէ և ուսուցանէ և խրատէ զաշակերտս, իսկ նոքա զժողովուրդս»: Այս խորը գիտակցությամբ էլ Մայր Աթոռի երիտասարդ միաբանները Իջման Ս. Սեդանի առջև ծնրադիր, մեր հայրերի սրբազան աղոթքներով և շարականներով պարուրված, Սրբազան Հոր ձեռքից սուսացան վարդապետական գավազան կրելու իրավունքը, որով պարտավորվեցին պահպանել և պաշտպանել իրենց վստահված հոտը զանազան փորձերիկներից:

Արարողության ավարտին Տ. Ներսես արքեպս. Պողապալյանը շնորհավորելով նորընծա վարդապետներին, իր բովանդակալից խրատականում շեշտում է Հայ Եկեղեցու կյանքում վարդապետի նվիրական կոչման կարևորությունը հայ հավատացյալ ժողովրդի հոգևոր դաստիարակության գործում:

«Էջմիածին» ամսագրի խմբագրությունը ջերմորեն շնորհավորում է Մայր Աթոռի երիտասարդ միաբաններին՝ մասնավոր վարդապետական իշխանությունն ստանալու առիթով, և ցանկանում, որ նվիրումով և անշահախնդրությամբ ծառայեն Հայաստանյայց Առաքելական Սուրբ Եկեղեցուն և Մայր Աթոռ Սուրբ Էջմիածնին: